



Gieri Giusep Pfister-Berther Rueras/Schlans

☆ 08-04-1923

† 24-03-2005

Suenter biars onns da sufrientscha ha Sep Pfister, sco el vegneva numnaus enta Rueras terminau il cuors terresteir la Gievgia sontga, ils 24 da mars 2005, gest ella jamna nua che nus celebrein la passiuin, mort e levada da nies Scaffider e Spindrader. Da Sonda sontga, ils 26 da mars han consorta Lisabeth, soras, frars, parents ed enconuschents accompignau il defunct

sin siu davos viadi sin santeri a Sedrun. El ruaussi en pasch e gaudi la glisch pascala.

Cuors dalla veta

Gieri Giusep Pfister ei naschius ils 8 d'avrel 1923 a Schlans ensemen cun siu frar schumellin Gion Mathias Pfister-Rothmund. Ensemen cun dus frars e treis soras ha Sep passentau ina biala affonza en in ambient puril a Schlans. Havend frequentau las scolas dil vitg hai giu num da segidar sil bein puril, per levgiar la truscha a bab e mumma. 1949 miera la cara mumma. Ina gronda frida per mariu e famiglia. Ins cala cul puesser. Sep anfla occupaziun a Basel en ina scrinaria. Duront sis onns lavura el sco scrinari-gidonter. Siu preferiu mistregn da scrinari ha el buca ughegiu da far en quels onns da scartezia. 1955 ha el la cuida d'ina piazza tier la bieraria «Feldschlössli» a Basel. Duront 33 onns tochen tier la beinmeritada pensiun ha Sep surviu en quella fatschenta per cumpleina cuntentientscha. Ils davos 20 onns sco chef da rampa.

Anno 1959 ei Sep sespusaus cun la giuvna Lisabeth Berther da Rueras. Il dacasa ei a Basel. Deplorablamein resta la lètg senza feglionza. Persuenter han els fatg bia bien cun la Prisca, feglia dil frar Vigeli.

Temps liber

Duront il temps liber era Sep bia en iert ch'el veva affitau dil marcau Basel. Era far mobillas per agen diever era siu grond plascher ed el haveva bien dun ed inschign leutier. Las vacanzas passentava Sep adina a Rueras tier la sira Lisabeth. Rueras plascheva ad el. Cun caschun ha el cumprau in sulom e baghegiu 1969 la Casa plauns odem Rueras. 1988 astga el entrar en pensiun. Sia dimora preferida ei ussa permanent a Rueras en atgna casa cun sia cara consorta. Liung'uriala ussa enconuscheva Sep buca. Far uorden entuorn casa, haver quitau da plontas e flurs. Lavur en iert sper casa dil Toni meister. Ir a spass, grondas e pintgas turas contemplond la natira. Propi bein en gamba.

Tenuta

Miu vischin Sep era dottaus cun fin caracter da demananza gentila. Gie buca vilentar enzatgi. Ina paterlada sur la seiv ni sin meisa canorta era adina honzelia e fageva plascher.

Malesser

1994 ha Sep ina greva operaziun el spital a Turitg. Mo el serevegn dètg pulit. Anno 2000 puspei dimora el spital a Cuera. Dapi lu adina mender. Senza sutga da rodas mava nuot pli. Sia cara consorta tgira a casa il car pacient cun grond quita e carezia ed era cul sustegn dil miedi, spitex e terapeut. Cul Sep eis ei vegniu tgeu, mo tuttina era el engrazieivels a tuts pils survetschs e visetas cun in surrir sin sia fatscha. La malsogna smasa sias forzas. cun 82 onns spendra siu Scaffider tuts mals e pren el en la patria celestiala.

Alla cara consorta Lisabeth e parents sincera condolientscha e gronda forza da purtar la crusch dada da Diu. Seconsolei culs plaidis:

*Il Segner ha dau
il Segner ha priu
il num dil Segner
seigi benedius.*